

Preĝo de la kuracisto

Ho Dio de la vivo kaj Dio de la morto,
Rigardu la turmenton de mia profesi'
Kaj turnu la orelon al la humila vorto
De homo suferanta ĉe homa agoni'!

Por fronti la batalon de lumo kaj de ombro
Al ĉiaj lokoj mi iras, palaco kaj kaban',
Sed kiel mi sukcesos, se ies tagonombro
Finiĝos pro decido de via pova man'?

Sur korpo frostiĝanta de ia paciento
De vivo kaj de morto fariĝas la batal':
Armilon en la mano, obstinaj en silento,
Mi luktas por la vivo, vi luktas por fatal'...

El scio kaj praktiko dum jaroj akiritaj
Mi uzas kaj manovras la manon sur tranĉil':
Mi tranĉas, mi kripligas per strekoj senhezitaj,
Se nur mi povas porti la vivon al stabil'.

Se mia mano venkas la oston de la tombo
Post harda kaj peniga batalo por la viv',
Mi vidas retiriĝi al sia katakombo
La morton funebrigan en spita ofensiv'.

Se tamen el la korpo la tuta vivo fuĝas
Kaj lasas min klopodi sur la kadavro nur,
Sovaĝa mortigisto rimorse mi min juĝas,
Ĉar mian bisturion makulas sangospur'.

Mi petas heziteme la pagon por la servo:
La mono min turmentas, se homo mortis for;
Se ree fluis sango kaj reviviĝis nervo,
Pri mono vorto ĝenus en tia ĝoja hor'!

Dum mia tuta vivo, milfoje post recepto,
La samajn rekompencojn mi havas por la task':
Al mia vango ĵetas la homoj sen escepto
Rideton post sukceso, insulton post fiask'...

Ho Dio de la vivo, konsentu energion
Al mano kaj al koro de ĉiu kuracist',
Ke ĉiu kontraŭstaru la mortan asfiksion,
Eĉ se li tial perdas la lumon de ekzist'!

Ho Dio de la morto, provizu lin per forto
En la humana koro vivanta inter ĝem',
Ke li laboru ĉiam, sentime ĉe la morto

De fremdaj, de amikoj, de filo, de si mem!